



拚番薯

煮飯摻一兜番薯較好食哦。現時個人愛食番薯，愛佢甜甜个味、軟軟述述个感覺。在日本時代生活過個人，聽著今個人恁愛食番薯，去便利商店買焗番薯食，會感覺實在時代無共款啊。成過係藏空襲、食番薯簽飯，食到會驚。這滿攏無共啊。

成過細漢時，田底種番薯，到拚番薯个時，歸屋下個人做一下攏愛真無閒。在田底用牛拖犁犁番薯行，犁過了後，歸陣人跔後背提畚箕撿番薯，攞跔一個人牽布袋，撿湊即漕落布袋內底。布袋若張湊，即攞起來。到時即會脛著歸田洋个番薯布袋。嘛有直接枷番薯拚落牛車底載轉。遐時務若像在做醮，歸田洋攏係人。等主人家枷番薯收成後。隨跔歸大陣老老嫩嫩在遐撿犁無著抑係較毋成猴个番薯。撿番薯个人手擎一支掘仔攞攞一隻桶，罔糶罔糶，有時務用腳罔踢罔踢，若踢著一莖大粒个番薯即若像著獎券，暢壞壞。

屋下這裡嘛係鬧熱滾滾，老儕、細子做一下出動，大家枷番薯鬚掣莫，有个枷掣好个番薯直接送去倉庫囤。另外一兜用畚箕畚去井脣，用水洗得佢淨俐，攞來用番薯絞絞做番薯籤，用畚箕捧去泥坪平頭搥搥个炙日頭。所以在頭前坪，會脛著真多人在無閒。番薯籤炙到暗啊，即愛用法齊掃歸墩，用布帆揹起來，正毋會凍露水抑係得雨涿。

反轉日，愛用穀耙枷番薯籤耙開炙日頭。嘛愛有人顧，有枵雞企在遐肖想偷食。毋過人講「枵雞無惜箠，枵人無惜面皮」若像有影。雞用棍仔攔走，趁你無注意个時，又攞來偷食。正經係「顧賊歸夜，做賊一時」。防毋會了。等番薯籤炙燥，愛用布袋入入起來囤在倉庫，討食个時提桶仔去張，三頓攏係番薯籤飯，在飯底正有一碗頭个淨米飯定。所以成過個人正會講食番薯食到會驚。現時脛著用鐵牛在拚番薯，用拖拉庫載，確實時代係無共啊！

作者：李秉璋

☆詞彙學習☆

【拚番薯】biang^ˊ han^ˊ shi^ˋ：番薯收成。

【攞】lien^ˋ：縫。

【做醮】zoo^ˊ zioo^ˊ：建醮。在戰爭時期向神明發誓若能保得平安，或是新廟落成時，做大型的酬神演戲回報神明護佑。

【老老嫩嫩】loo^ˊ loo^ˊ nun nun：老老少少，在此處是指老人與小孩。

【毋成猴】m shang^ˋ heu^ˋ：此處指不具賣相的番薯。太小顆或是有所損壞或被蟲蛀鼠咬的番薯。

【掘仔】kud^ˋ a^ˋ：小鋤頭。

【一莖】rhid^ˊ hon^ˋ：一條或一顆，番薯的計量單位。

【番薯鬚】han^ˊ shi^ˋ si^ˋ：番薯的根長的非常多如同鬚鬚般。

【番薯絞】han^ˊ shi^ˋ gau^ˊ：器械上裝設具有擦菜板功能的轉盤，用一手轉動轉盤，一手將番薯推進，可迅速將番薯擦成籤的器具。或稱番薯籤絞。

【平頭】piang^ˋ teu^ˋ：從頭到尾。指前庭的每個角落。

【枵雞】iau^ˋ ge^ˋ：飢餓的雞，此處指在旁虎視眈眈伺機偷吃的雞。

【淨米飯】ciang mi^ˊ pon：純白米飯。

【拖拉庫】too^ˋ la ku^ˊ：大貨車。